



PCN ta oumentá penshunnan i ta revoká redukshon di 2017

KRALENDIJK - Fondo di Penshun Karibe Hulandes (PCN) a oumentá penshunnan entrante 1 di yanüari 2026. E oumento ta konsistí di un indeksashon di 3,2% pa motibu di gastunan di kosto di bida ku a subi i revoká kompletamente e redukshon di penshun di 2017.

E oumento di penshun ta konsistí di dos medida separá:

- un indeksashon di 3,2%, komo kompensashon pa gastunan pa kosto di bida ku a subi;
- revoká e redukshon di 3,5% ku a introdusí na 2017.

E indeksashon di 3,2% ta basá riba e promedio midí di inflashon na Boneiru, Saba i Sint Eustatius.

Na 2017 PCN a hañ'é obligá di redusí penshunnan ku 3,5%. Motibu pa esaki tabata un grado di kobertura muchu abou, lokual a surgi mediante eksigensianan legal mas severo di espektativa di bida i interes. No a premirá e adaptashonnan aki na komienso di PCN na 2010. Pa fortifiká e posishon finansiero di e fondo, PCN a risibí e tempu ei un kontribushon finansiero èkstra di 31 mion dòler di Estado Hulandes. Un di e kondishonnan pa e kontribushon aki tabata ku lo a redusí penshunnan temporalmente.

Posishon finansiero fuerte ta hasi korekshon posibel

Danki na e posishon finansiero fuerte di PCN entrante 31 di dezèmber 2025 a resultá awor posibel pa revoká e redukshon di 2017 kompletamente.

Presidente Harald Linkels:

“Ta un logro importante ku nos por revoká awor e redukshonnan di 2017. E tempu ei tabatin hopi inkietut riba nos islanan i nos tabatin kompreshon pa e protesta di partisipantenan. P’esei nos ta hopi kontentu ku awor nos por oumentá e penshunnan konsiderablemente.”

Penshonadonan a risibí e pago di penshun oumentá e luna ku a pasa.